

Un minister neutral of corte



SAC ta haya intervencion di minister Oduber peligroso ya cu e minister no ta miembro di SAC y toch kier purba mete den decisionnan cu e fundacion ta haci. "Minister mester ta neutral." Si gobierno no ta duna permiso general pa organisa Carnaval 61, SAC lo bay corte.

Les mas riba pagina A2

SAC:

“Si no duna permiso pa organisa carnaval, lo topa den corte”

ORANJESTAD — Stichting Arubaanse Carnaval (SAC) ta haya cu no por djis kita nan permiso pa organisa carnaval, particularmente pasobra ya caba nan ta preparando edicion di otro año.

Presidente Tecla Kelly hunto cu abogado Darin Crouch a declara esaki ayera durante un conferencia di prensa na bufete di abogado Ecury.

For di cu Carnaval 60 a caba, a surgi un conflicto entre gruponan di carnaval representa den Gruponan Uni y SAC. Gruponan Uni ta acusa SAC di no ta transparente y no ta inclui e gruponan den decision y ganashi di carnaval. Na mei abogadonan di ambos partido a intercambia carta riba esaki. SAC su Raad van Beheer a reuni siman pasa cu minister di Cultura, Otmar Oduber. SAC a keda hopi desapunta na forma cu minister Oduber a expresa su

mes, segun sra. Kelly. Minister Oduber lo a indica cu si no ehecuta su proposicion di laga directiva di SAC bandona nan puesto y laga un ‘triumvirato’ di miembronan di SAC, gruponan y gobierno tuma over, e lo recomenda na prome minister Mike Eman pa no duna e un permiso general na SAC pa organisa Carnaval 61.

Despues e reunion aki minister Oduber a saca un relato cu e reunion a bay den un bon ambiente y por lo pronto lo haya otro. Pero esaki no ta cuadra cu e realidad.

‘Mester ta neutral’

SAC ta haya intervencion di minister Oduber peligroso ya cu e minister no ta miembro di SAC y toch kier purba mete den decisionnan cu e fundacion ta haci. “Minister mester ta neutral y tambe lo mester yega na un solucion cu ta na bienestar di ambos partido. Pero



cu e actitud aki e minister ta haci uzo di poder y ta actua manera un persona caprichoso”, segun sra. Kelly. Ambos e presidente di SAC y abogado Crouch ta muestra riba preparacionnan cu ya caba ta andando pa proximo edicion. Si acaso no duna permiso sin motibo valido despues di 60 año cu SAC a organisa carnaval sin problema, lo bay topa otro dilanti mesa berde segun sr. Crouch. Sra. Kelly di su banda ta bisa cu ya caba ta papiando cu polis, anto riba dje ya a publica e fechanan di tur parada y evento.

‘Habri buki’

“SAC nunca tabata tin su portanan cera pa tuma representante di grupo como miembro. Den varios reunionnan ta wordo bisa cu

grupo kier bira miembro pero te cu e fecha di awe no a haya ningun aplicacion.” Gruponan ta haya cu SAC tin cu habri buki. “Wel SAC su buki ta bay na diferente sponsor y tambe minister”, segun sra. Kelly.

“Gruponan ta bisa cu tin perdida, pero nan organizacion ta muestra esaki pa pueblo wak?” Presidente di SAC tambe a muestra riba situacion cu a surgi despues cu Musica a tuma Calypso & Roadmarch Contest over di SAC, na un manera forsa segun e, y a haya su mes confronta cu perdida financiero. Awe mainta tin un conferencia di prensa di minister Oduber planea pa duna su reaccion ariba ponencianan cu SAC y nan abogado a haci ayera. □